

Radunanza generala dal CAS EB, ils 30 avrigl 2012
Il hotel Staziun a Zernez

Tractandas

1. Protocol da l'ultima radunanza dals 20 mai 2011 a Strada
2. Rapport da la presidenta
3. Rapports dals differents schefs
4. Rendaquint 2011 e rapport dals revisuors
5. Contribuziun annuala da commembranza
6. Tschernas pel bienni 2012 - 2014
demischiunà: presidenta, Gianna Rauch Poo
7. Onurificaziuns dals veterans
8. Infuormaziun Alp Sprella, Val Müstair
9. Varia

Nossa presidenta Gianna Rauch Poo driva la radunanza generala a las 20.15 h e po salüdar a 52 commembers/bras. Gianna salüda specialmaing a nos commembers d'onur Irma e Jachen Egler, a Jörg Kindschi chi tegna davo la radunanza amo ün referat ed a la delegaziun da la Val Müstair. Il cumün da Zernez ha hoz üna sairada d'infuormaziun a regard las fusiuns dals cumüns uschea cha'l capo da cumün sar René Hohenegger as lascha s-chüsar per quista radunanza dal club alpin.

Divers commembers/ bras s'han laschè s-chüsar in scrit o a bocca. Sco dombravuschs funcziunan Anna Barbla Buchli e Duri Tall.

1. Protocol da l'ultima radunanza generala dals 20 mai 2011 a Strada

Il protocol vain preelet ed approvà cun applaus.

2. Rapport da la presidenta

Nossa presidenta rapportescha sur da sia lavur sco presidenta dal CAS EB. La suprastanza ha fat diversas tschantadas d'ürant l'on scuors e la presidenta es statta a sezzüdas our da la val per seguir la politica federala e chantunala dal CAS Svizzer. Gianna ha gnü sezzüdas cun ils oters presidents dal CAS dal Grischun e culla ARG (= Alpine Rettung Schweiz).

Blera lavura ed adüna darcheu sezzüdas haja dat cul proget da l'alp Sprella. Detagls lasupra survgnivat suot la tractanda no 8. Eir scha quist on nu vaina gnü ingünas fabricas, dad organisar festas o uschigliö alch extraordinari es la lavur da tuot la suprastanza ter gronda e vasta.

La suprastanza s'ha stuvü occupar cun la successiun da la presidenta, chi ha cuntshaintamaing demischiunà. A Gianna paraiva ün bun mumaint per far il müdamaint, causa chi nu sun averts progets plü gronds, fabricats etc. No vain eir chattà üna persuna adattada, vair tractanda no 6.

Cun data dals 30 avrigl d'eiran inscrit 906 commembers in nossa società. Grazcha a tuots per lur sustegn e fideltà.

Gianna ingrazcha als guardgia chamonnas da Tuoi, Lischana ed eir a tuots da la Linard, als schefs da chamonnas, a la grupp da salvamaint, a la grupp da chans, als manaders dals CAS e OJ cul coach, revisuors da quint, als redactors da nossa gazettina ed al redactor da la pagina d'internet ed a tuots quels chi praistan lavur cumöna. Ün ingrazchamaint eir a la suprastanza per la lavur prastada a favur da nossa secziun.

I circulescha üna glista cun tuot ils nouventrats ed ils sortits, - tals sun eir manzunats aint in nos cudeschin no 45 - uschè cha Gianna desista da tils preleger. Gianna dà ün cordial bivgnaint a tuot ils nouventrats.

Gianna as metta eir in avegnir a disposiziun per il proget Alp Sprella, scha quai es giavüschè da la nouva suprastanza. Quista dumonda vain tractandada illa prossma sezzüda da suprastanza.

In quist lö ingrazcha Gianna a tuots da la suprastanza per la buna e constructiva collavuraziun, per las amicizchas e per la cumünanza, sia illas sezzüdas, in gita o illa vita privata.

Dad ün commember vaina stuvü tour cumgià per adüna, quai es Daniel Linsel. La radunanza s'adozza in sia memoria.

Il rapport da la presidenta vain approvà cun applaus.

3. Rapports dals differents schefs

3.1 Schef da salvamaint

Jöri Felix rapportescha in cuorts plets sur da sia lavur sco schef da salvamaint.

3.2 Schef da gitas

Alfons à Porta ha trat üna buna bilantscha a regard las gitas da la stà passada. Tuot las gitas han pudü gnir manadas tras cun avuonda partecipants. Il programm es stat fich bun ed ils rebombs ferm salüdaivels.

L'inviern passà vaina stuvü desdir vaira bleras gitas, causa l'ora nö adüna favuraivla e causa las fradaglias dal favrer.

Tuot las gitas han pudü gnir manadas tras sainza accidaint.

3.3 Schef OJ

Tumasch à Porta ingrazcha a tuots ils agüdants chi s'ingaschan in ün o l'otra maniera per l'OJ.

La partecipaziun pro las differentas gitas nun eira adüna gronda avuonda uschetas ch'el ha eir stuvü desdir gitas. L'eivna da prümavaira ad Arco vain manada tras. Il rampignar illa halla attira ils uffants e la partecipaziun es zuond allegraivla.

3.4 Schef da chamonnas

Duri Roner rapportescha sur da sia lavur sco schef da chamonnas.

La chamonna Tuoi ha bunas frequenzas.

Sülla Linard vaina stuvü installar ün nouv generatur, il vegl es i ruot tras la sajetta. La turbina per prodüer forza electrica es ida in revisiun. Ün grond grazcha fichun a tuot ils guardgia chamonnas per lur ingaschamaint instancabel.

Sülla Lischana vaina montà 4 tablas fotovoltaicas in plü, uschea cha'l generatur actual es ferm avuonda per prodüer il rest da la forza.

Ils rapports dals differents schefs vegnan acceptats cun applaus.

4. Rendaquint 2011 e rapport dals revisuors

Il rendaquint è'l rapport dals revisuors sun publichats aint illa gazettina. Il quint da gestiun 2011 muossa ün vanz da sfr 487.20. La facultà netta als 31.12.2011 s'augmainta sün sfr 202'665.66. Andri declera cuort il rendaquint ed eir il quint da gestiun.

Las chamonnas Tuoi e Lischana sun aint cun sfr. 368'000.-- e sfr. 372'000.-- davo la fabrica e davo avair investi dret gronds imports. L'impraist dal stadi vaina pudü diminuir per sfr. 18'500.-- sün nouv sfr. 55'500.--.

Ils revisuors da quint ingrazchan in lur rapport al chaschier per sia gronda lavur, a Jöri Felix per manar la chascha da salvamaint ed ad Andri Poo per seis sustegn culla chascha dal OJ. Els propuonan acceptaziun dal quint 2011.

Il rendaquint 2011 vain acceptà cun unanimità da vuschs e la radunanza generala dà discharg a la suprastanza.

5. Contribuziun annuala da commemoranza

Per la contribuziun annuala dal 2012 propuona la suprastanza il seguaint sco fin qua:

frs. 28.-- l'on per singuls commembers
frs. 56.-- l'on per famiglias
frs. 15.-- l'on per giuvenils in famiglias na commembras

La radunanza generala fa bun quista proposta.

6. Tschernas: demischiunà ha nossa presidenta Gianna Rauch Poo

Gianna Rauch es daspö il 1996 aint illa suprastanza da nossa secziun. Il prüm sco actura e dal 2004 ha ella surtut la carica da presidenta da Jon Andrea Könz.

Andri Linsel da ün cuort reassunt da tuot las lavuors prastadas da Gianna, chi ha pudü manar tras las fabricas da la Lischana e da la Tuoi e chi s'ha ingaschada fich ferm per l'Alp Sprella. Ella es eir aint illa suprastanza dal comitè central dal CAS Svizzer e s'ingascha là in pustüt per las regiuns muntagniardas.

Cun ün bun per tuot la famiglia - no sperain ch'ella haja uossa daplü temp per passantar insembel cun la famiglia - e cun ün püschel fluors onuraina a nossa presidenta e sperain da tilla vzair amo bleras jadas in gita. I segua ün grond applaus per Gianna.

Sco successur da Gianna propuona la suprastanza a Heinz Gross da Zernez chi as preschainta cuort.

El vain elet cun applaus.

Il rest da la suprastanza as metta amo üna jada a disposiziun e tuots vegnan elets cumplexivmaing cun applaus.

7. Onurificaziun dals veterans

Onurificaziuns vaina differentas quist on:

25 ons commembers sun: Georg Schuhmacher da Münchenstein, Gian Reto Bezzola da Geroldswil, Martin Büsing da Scuol, Chasper Ans Gaudenz da Fuldera, Arno Camenisch da Strada.

40 ons commembers sun: Not Buchli da Sent, Mario Giacometti da Gsteigwiler, Robert Giacometti da Zernez, Tumasch Planta da Scuol, Rolf Hüsser da Ftan, Fritz Häberli da Scuol.

50 ons commembers sun: Sievi Gliott da Davos Platz, Hans Heizmann da DE-Freiburg, Johann Felix da Brail.

La presidenta surdà a tuot ils veterans manzunats i'l rapport üna medaglia resp. ün diplom e tils ingrazcha fich per lur gronda fideltà.

8. Infuormaziuns proget Alp Sprella, Val Müstair

- In schner 2011 d'eiran avant mans tuot ils resultats dals differents stüdis e davo quai vaina inoltrà la dumonda da fabrica per la procedura BAB.

- Las organisaziuns da l'ambient han inoltrà üna procedura da partecipaziun.

- In schner 2012 haja dat üna maisa raduonda cun il mediatu lic. jur. Thomas Nievergelt da Semaden. El vaiva surgni l'incumbensa da l'ARE ed a fat üna fich buna mediaziun. I sun gnüts discutats differents puncts per ir in direcziun dad ün cumpromis, sco per exaimpel:

- strichar üna part dals lets
- la chamonna vain custodida be d'instà
- strichar la colliaziun tanter la tea e la stalla, per diminuir il proget e laschar plü natüral sco pussibel
- Il cumün Val Müstair füss pront da dar ün territori o üna zona da protecziun sco egualisaziun.
- definats sun eir puncts importants in connex cun il proget "Besucherlenkungs-konzept". Üna signalisaziun clera per peduns e velos p.ex. sun previs in mincha cas, independentamaing dal proget Alp Sprella.

- Davo trais eivnas da ponderaziuns han las organisaziuns da l'ambient (WWF, Pro Natura e Landschaft Schutz Schweiz) decis da nun ir aint in las propostas da cumpromis e da na lavurar illa direcziun proponüda.

- La Mountain Wilderness ed ils uffizis chantunals (uffizi da chatscha e da pes-cha e da l'ambient) füssan stats perinclets cullas propostas da cumpromis.

- Uossa esa da verer cul ARE co chi va inavant.

- In mincha cas infuormescha la suprastanza darcheu sur dal proget.

Gianna fa la dumonda a la radunanza sch'ella es d'accord cun nos agir ed es eir pronta per ulteriuras dumondas.

9. Varia

- Alfons ha mis insembel ün bel program da gitas per quista stà e s'allegra da mincha partecipant/a.

- Ils 5 avuost vain organisà üna gita cumünaivla insembel cun quels da Tavo, chi han pudü festagiar l'on passà il giubileum da 100 ons. Ils detagls chattaivat aint il cudeschin. No ans allegrain sün üna gronda partecipaziun.

- Dal 2013 festagescha il CAS Svizzer seis giubileum da 150 ons, cun differentas activitas in tuot la Svizzra cun spassegiadas, cultura etc. Il punct culminant sarà il festival da muntogna (Gipelkonferenz) sül Rondo a Puntraschigna in october dal 2013.

La presidenta serra la radunanaza a las 21.30 h e giavüscha a tuots ün bun arriv a chasa.

Davo la part uffiziala surdà Gianna il pled a Jörg Kindschi chi referischa sur da sia lavur cun las lavinas, la naiv, las serradas da vias e las precauziuns chi bsögna da trar - tuot tenor la situaziun da naiv ed ora.

Scuol, ils 27 gün 2012

Per il protocol:

Corsina Feuerstein Betschart
actuara

Gianna Rauch Poo
presidenta